

# Van sente Caterinen


editie M. Gysseling

## bron

*Van sente Caterinen*. In: Instituut voor Nederlandse Lexicologie (samenstelling en redactie), *Cd-rom Middelnederlands*. Sdu Uitgevers/Standaard Uitgeverij, Den Haag/Antwerpen 1998.

Zie voor verantwoording: [http://www.dbnl.org/tekst/\\_sen004mgys01\\_01/colofon.php](http://www.dbnl.org/tekst/_sen004mgys01_01/colofon.php)

© 2012 dbnl



**[Van sente Caterinen]**

- Si segghen alle nu montghemene  
 Dat hi es vrain ghod allene  
 Want vwe affeghode ne hebben macht  
 Ne ghene wile dach no nacht  
 5 Wa<sup>e</sup>ndi dat ghod niet wreken ne sal  
 Tquaet dat ghi den ke<sup>r</sup>stinen doet al  
 Jahi sekerleke teghoeder trowen  
 Ende v saels noch <sup>wel</sup> sere berowen  
 Alsoe de keiser dit hadde ghehoert  
 10 Van sinen wiue al dese wort  
 Hem verwandelde al sijn moet  
 Ghelijc dat enen verwoetden doet  
 Om datter liede so vele tewaren  
 Ane ghode doe bekert dar waren  
 15 Nochtanne was hi in therte binnen  
 Droeuwer van der keiserinnen  
 Dat soe to hem so hadde ghesproken  
 Ende sine ghebode mede tebroken  
 Doe seidi vrowe wat meent di  
 20 Dat ghi aldus hier spreect te mi  
 Mi dinct dat ghi sijt verkert  
 Ende hebt der kerstine wet ghelert  
 Ende ghelaten onse ghode [dit] verstaet  
 [Seker]leke [na] der kerstine raet  
 25 Hic hebber vele ghedaen doeden  
 Van den ghenen die mine ghoden  
 Lieten. ende braken mijn ghebot  
 [E]nde gheloefden ander kerstine ghod  
 [D]at selue tempeest sie hic van v  
 30 Dat rout mi sere int herte nu

- Het dinct mj wesen wonder groet  
 Want ghi sijt mijn bedde ghenoeft  
 Ende mijn ghetrovde wijf  
 Ghi sout mi lief hebben alse v lijf  
 35 Dat ghi scieghen mj wilt sijn  
 Dat versuvaert mi therte mijn  
 Na dien dat ghi sijt ghekert  
 Enter kerstine wet hebt gheleert  
 Ende mine ghode hebt ghelaten  
 40 Dat es dullede bi caritaten  
 Want wart dat sake dat hic nu liete  
 Dese dinc nu ghaen te nieute  
 Binnen roeme wel vele vrouwen  
 Souden hem houden te ghoder trowen  
 45 An vwen ghod ende laten den haren  
 En tarna soud<en si dan tewaren>;  
 Hare manne alle bekeren  
 Enter kerstine wet hem leeren  
 Dan soudic saen wel cortelike  
 50 Ontaerft sijn van minen rike  
 Bider trovwen die hic bem sculdech  
 Minen ghod die es machtech  
 Ne wildi niet laten vwe dullede  
 Enter kerstine wet oec mede  
 55 Hic sal v thoefst af doen slaen  
 Ende als men dat heeft ghedaen  
 So salic v doen werpen sciene  
 Vor de vogle ende vor de diere  
 Ay v hofst ende vwe lichgame  
 60 Was mi oit so wel bequame

- Warumme wildi nu pine groet  
 Ghedogen ente bettere doet  
 Hic sal v met pinen sere dvinghen  
 Ende vwe borste af doen wringhen  
 65 So wat so doe die quade tyran  
 Conste ghedregen alsen fel man  
 Sone mickets niet een twijnt  
 Alst wel scen der naer noch sijnt  
 Doe hiet die keiser dat men tervaert  
 70 Die vrovve leedde terpassien wart  
 Alsoe die keiserinne wech ghinc  
 Dar soe die bettere doet ontfinc  
 Doe sach soe te caterinen wart  
 Die stout ende cone was onvervaert  
 75 Ende seide edele maegt nu doet  
 Vwe ghebede doer vwe oemoet  
 Tote onsen here ouer mi  
 Dat hi altoes mi moete sijn bi  
 En tadt hi mij hir in dit torment  
 80 Vertrousten moete ende sijn omtrent  
 So dat altoes theloeuē mijn  
 An hem ghetrowe moete sijn  
 Doe seide die maegt ay edele vrowe  
 <Onsiet v niet bi miere trouwe>;  
 85 Hebt vast gheloeue an onsen here  
 Ende roept op hem ghenade sere  
 Hi helpt altoes wel sinen vrient  
 Die hem hier ter trowen dient  
 Hi sal v ouer dit curte leuen  
 90 Saen wel groete bliscap gheuen  
 Ende ombe deanxene ente pine

- Dar ons bede in staet te sine  
Sullen wi de crone van der victorie  
Entfaen nu saen in sine glorie  
95 Doe wart blide die keiserinne  
Ende hare dochte in haren sinne  
Dat soe mochte ghedoeghen wel  
So wat tormente die ware fel  
Ombe de minne van onsen here  
100 Dien soe begherde te sine sere  
Die cnapen ne dorstens laten niet  
Sine daden dat hem die keiser hiet  
Si bonden dier vrouwen bede har hande  
Ende wronghen haer af althande  
105 Bede hare borste sonder sparen  
Dat was een groet torment tewaren  
Dar naer die keiser sententie ghaf  
Dat men hare sloech thoeft af  
Alsoe die daet doe was ghedaen  
110 Doe vor soe stappans sonder waen  
Met ghode bouen inden troene  
Ende ontfinc der heelgher crone  
Ghelijc den andren maertelaren  
Die vor hare ghepassijt waren  
115 Dar naer inde scrifture hic las  
Dat die keiserinne doe was  
Aldus ghepijnt ende doet dar lach  
Opten drie en tuvintechsten dach  
Jn nouembre dat es ghescreuen  
Doe ghinc porfirius dar bi nachte